

Tuzla, 20.12.2016.godine

Održana VI međunarodna konferencija škola „Aspekti i doprinosi partnerstva između zajednice i škole“

Međunarodno udruženje "Interaktivne otvorene škole" (MIOS) je 19.12.2016.godine u Hotelu Mellain održalo VI Međunarodnu konferenciju škola Tuzlanskog kantona pod nazivom "Aspekti i doprinosi partnerstva između zajednice i škole". Ova konferencija je vrhunac dvogodišnjeg rada MIOS-a sa 30 osnovnih i srednjih škola te predstavlja proslavu pozitivnih rezultata u sklopu projekta „Razvoj otvorenih škola“.

„Taj princip otvorenosti je vrlo bitan da bi škola mogla ispuniti zahtjeve koji su postavljeni pred nju. Vrlo je bitno pripremiti djecu za svijet koji se brzo mijenja, gdje su potrebne nove vještine i znanja, kako bi danas sutra oni koji završe školu bili konkurenti na tržištu rada“, istakla je direktorica MIOS Tuzla Edina Malkić za RTVTK.

Profesor doktor Predrag Pale sa Fakulteta elektrotehnike i računarstva iz Zagreba je dao ogroman doprinos uspjehu ove konferencije izuzetnim predavanjem koje je potaknulo prisutne da propitaju i osvijeste značaj svog doprinosa zajednici.

Paralelne panel diskusije koje su vodili Chris Jones, Alma Švraka, Amela Feukić, Jasmina Ćatić, Amir Hadžić, Melanie Roberts, Jasmina Omerdić i Jasmina Mehmedović su omogućile razmjenu iskustava prosvjetnih radnika iz Tuzlanskog kantona ali i Velike Britanije.

Sudeći prema izjavi Chris Jones, direktorica Internacionalnog centra izvrsnosti za otvorene škole u zajednici Velike Britanije, nije samo obrazovni sistem BiH u krizi. „Svi se danas susrećemo sa globalizacijom ekonomije, mladi odlaze iz zemlje, nastojimo da riješimo problem odlaska mladih. Sve škole se otvaraju prema zajednici, uvode roditelje u rad, sve se više saraduje, mladi se pripremaju za svijet sa kojima se susreću kada izađu iz škole“.

Posljednja izlaganja na konferenciji su držali Jane Frankish iz Velike Britanije i David Bundy sa Floride.

Poseban doprinos su dali učenici Mješovite srednje saobraćajne škole Tuzla, Mješovite srednje građevinsko-geodetske škole Tuzla, Mješovite srednje hemijske škole Tuzla, Srednje muzičke škole Tuzla i Gimnazije Ismet Mujezinović. Devet je učenika navedenih škola: Katarina Andrejaš, Lejla Delić, Maša Rašković, Harun Mutapčić, Vedad Halilčević, Tarik Jašarević, Rusmir Tahirović, Nermin Bratovčić i Armin Aličić, snimalo kratki dokumentarni film o Konferenciji koji je prikazan prilikom zatvaranja. Ovom prilikom se ponovo zahvaljujemo svima njima na odvojenom vremenu i kreativnosti koju su iskoristili za stvaranje filma, ali i direktorima i pedagozima škola koji su omogućili dolazak učenika na Konferenciju.

Također, zahvaljujemo se svim medijima koji su dali podršku i medijski pratili Konferenciju.

TIM MIOS